

LIAFUAN BADAQ S.E. PREZIDENTE TAUR MATAN RUAK NIAN IHA OKAZIAUN TOMADA POSE BA PREZIDENTE AUTORIDADE REJIAUN ADMINISTRATIVA ESPESIÁL OE-CUSSE AMBENO

Dili, Loron 30, fulan-Jullu tinan 2014

Señor Primeiru Ministru, señor sira membru Governu nian,
Señor Prezidente ba Autoridade Rejiaun Administrativa Espesiál Oe-cusse. Distintu konvidadu sira.

Exelénsia sira.

Nomeasaun ba Prezidente Autoridade Rejiaun Administrativa Espesiál Oe-cusse Ambeno nian sai nu'udar hakat importante ida atu avansa ba iha realizasaun projetu dezenvolvimentu sosiál- ekonómiku ida-ne'e.

Tanba ne'e, ho laran-haksolok mak ha'u asina dekretu nomeasaun, no fó-pose ba señor Dr. Mari Alkatiri, hanesan prezidente Autoridade ba rejiaun espesiál ida-ne'e.

Rejiaun Administrativa Espesiál Oe-cusse Ambeno sai nu'udar projetu nasional ida.

Estadu sei investe osan dolár miliaun atus ba atus iha projetu ida-ne'e. Povu Oe-cusse, no rai-laran tomak, depozita esperansa boot ba iha rezultadu sira.

Objetivu hosi investimentu ho kapital signifikante ida-ne'e maka transforma Rejiaun Oe-cusse sai polu dinamizmu ekonómiku ida, ne'ebé tenke sai:

- Sustentavel, hodi bele lori fonte foun sira rendimentu nian ba ekonomia nasional;
- Inkluzivu, ne'e katak, hamosu oportunidade foun sira atu inklui populasau nian;

Projetu dezenvolvimentu Oe-cusse nian ne'e hatuur iha pilár rua.

- Pilár sosiál ida: halo-kaman kondisaun moris ne'ebé kuran povu Oe-cusse nian; Halakon kiak; Oferece oportunidade atu hadi'a kondisaun sira moris nian iha Oe-cusse.
- Pilár ida seluk maka konstrusaun infrastrutura sira ho kualidade: portu ida ho aeroportu ida, estrada no transporte sira ho kualidade; eletrisidade no asesu ba bee-moos, Eskola sira, servisu sira Saúde no servisu sira públiku nian ne'ebé di'ak liután.

Infrastrutura sira-ne'ebé di'ak sei kria kondisaun atu dada empreezariu sira no investimentu privadu, hodi dinamiza no diversifika ita-nia ekonomia.

Estadu hakarak estimula kriaun empregu iha Oe-cusse. Ajuda kria oportunidade sira servisu nian.

Atu alkansa objetivu sira-ne'e, projetu ida-ne'e tenke aposta iha formasaun: prepara oan feto no oan mane sira Oe-cusse nian atu aproveita oportunidade foun sira-ne'ebé Rejiaun Administrativa Espesiál ne'e sei kria.

Investimentu maka'as iha Rekursu Umanu sira de'it mak sei permiti atu alkansa objetivu no meta sira dezenvolvimentu nasional nian ne'ebé ita iha ambisaun ba.

Oportunidade sira dezenvolvimentu nian ne'ebé projetu ne'e sei kria, tenke benefisia ema sira Oe-cusse nian no hadi'a, ho loloos, kondisaun sira moris nian iha Oe-cusse.

Projetu ne'e ba Oe-cusse, no sei benefisia populasau nian Oe-cusse nian. Maibé projetu ne'e nu'udar projetu ida-ne'ebé pertense ba rai-laran tomak.

Susesu Rejiaun Espesiál Oe-cusse nian sei iha impaktu ba nível tolu.

- **IMPAKTU LOKÁL**, iha moris povu Oe-cusse nian.
- **IMPAKTU NASIONAL**: reforsa Ekonomia Oe-cusse nian, sei iha impaktu iha ekonomia Nasaun tomak nian. Investimentu rai-laran nian iha Oe-cusse tenke iha retornu pozitivu la'ós de'it ba Oe-cusse, maibé mós ba rai-laran tomak, iha tempu ikusmai.

- No mós IMPAKTU REJIONAL: dinamizmu ekonómiku ne'ebé ita hakarak promove iha Oe-cusse tenke estimula komérsiu rejional, ho provinsia sira Indonézia nian ne'ebé besik liután no mós ho Norte Austrália.

Ekonomia Oe-cusse nian tenke sai polu dinamizadór ida kooperasaun tri-lateral nian entre Timor-Leste, Indonézia no Austrália, ho impaktu pozitivu iha prosperidade no estabilidade rejional.

Exelénsia sira.

Infrastrutura ho qualidade ezije planeamentu ho qualidade, no rigór iha ezekusaun.

Tinan sanulu resin rua funsionamentu Estadu nian hanorin ita atu iha kuidadu.

Ita tenke aproveita ezemplu sira di'ak liu nian ba planeamentu no implementasaun projetu sira no rejenta ezemplu sira ho qualidade aat, ka qualidade duvidoza.

Ita tenke foti lisaun sira esperiéncia nian. Sai rigorozu. No prevene gastu rekursu sira-ne'ebé naran-naran de'it.

Ita iha buat hotu ne'ebé nesesáriu atu hetan susesu.

Buat hotu iha ita-nia liman, ita sei hetan.

Timor-Leste, ohin halo semana ida, hala'o Konferénsia Xefe Estadu no Governu sira CPLP nian.

Ita prezide Komunidade Rai sira-ne'ebé Ko'alia Lian Portugés foin ba dala uluk.

Durante prezidénsia ne'e, ne'ebé oras ne'e ita hahú, ita hakarak fó prioridade ba kooperasaun ekonómika entre Estadu membru sira. Kooperasaun rejional, hanesan mós kooperasaun iha CPLP serve, iha kazu rua-rua, ita-nia objetivu sira atu haklean integrasaun armonioza Timor-Leste nian iha mundu, diversifika ekonomia, dezenvolve nasaun.

Konferénsia CPLP sai nu'udar susesu ida. Timoroan oan tomak iha razaun atu iha laran-haksolok hosi servisu ne'ebé hala'o ona. Maibé Prezidénsia CPLP ne'e sai nu'udar dezafiu ida tinan rua nian—iha tinan rua 2014-2016. Ita foin iha prinsípiu nia laran. Iha servisu barak iha tempu oin mai.

Atu realiza prezidénsia ida ho susesu di'ak, no realiza objetivu nasaun nian, ita tenke hala'o servisu ne'e ho seriedade no rigór boot.

Objetivu Oe-cusse nian tenke sai ezemplu seluk ida ho qualidade no rigór. Iha infrastrutura, iha kumprimentu ba kalendáriu sira, iha qualidade servisu públiku sira—iha aspetu sira hotu.

Ita tenke hatene hatudu buat di'ak liu hosi ita-nia kapasidade sira. Ho seriedade de'it no rigór maka ita bele hamosu riku-soi liután, hodi aumenta partilla ba benefísiu sira, hanesan ita hakarak.

Objetivu Estadu nian maka redistribui lukru sira projetu nian no hadi'a comunidade nia moris.

Señor Dr. Mari Alkatiri.

Koñesimentu no esperiéncia Vossa Exelénsia nian hatudu hanesan ema ida-ne'ebé iha abilidade liu atu alkansa objetivu sira Rejiaun Administrasaun Oe-cusse Ambeno nian.

Nasaun koloka diresaun ba projetu ida ho importánsia estratéjika ne'e iha Vossa Exelénsia nia liman.

Hanesan Prezidente Repúblika ha'u dezeja susesu boot ba iha Ita-Boot iha servisu ida-ne'e. Vossa Exelénsia bele konta ho Prezidente Repúblika. Iha ámbitu sira ha'u-nia responsabilidade nian, ha'u sei prontu nafatin atu kontribui, atu nune'e projetu Oe-cusse ne'e alkansa objetivu sira-ne'ebé hatuur tiha ona.

Obrigadu barak ba Ita-Boot sira hotu. Servisu di'ak.
